

Baselgia e guerra civila

La ierarchia catolica e la Spagna 1936-1939

DA GUIU SOBIELA-CAANITZ

■ 57 onns suenter la fin da la guerra mundiala vegn anc adina publictà davart la tenuta da la Baselgia catolica (BC) areguard las dictaturas da Hitler e Mussolini, ch'i sa tractia da papa Pius XII (Eugenio Pacelli, 1876-1958) u da singulas baselgias naziunalas. Tals perscrutaziuns manchentan il pli savens guerras localas che valan tutina sco annunziadas dal grond conflict. Tgi tegn anc endament quellas da Giapun encunter la China (davent da 1937) e l'Uniu sovietica (1937-1939)? Meglier statti cun la guerra civila spagnola (1936-1939), entrada en la litteratura englaisa grazia a «For Whom the Bell Tolls» («Per tgi ch'i tutga da bara») d'Ernest Hemingway (1899-1961) e «Homage to Catalonia» da George Orwell (1903-1950). Istorichers da Spagna e d'auters pajais gidan a chapir adina meglier la tenuta ecclesiastica visavi la republica da la Front populara e la rebelluon militara che l'ha finalmain destruida. Lezza dumonda vegn anc cumplitgada dal fatg che la guerra spagnola è vegnida a fin chalanda avrigl 1939, pia suenter la mort da papa Pius XI (Achille Ratti, ils 10-2-1939) e la tscherna da ses successur (ils 2-3-1939), il qual, da l'entschatta enna, ha mess accents diplomatics vaira differentes.

Disditga malgrad privilegis

Ins na po chapir la politica ecclesiastica dals trais onns en dumonda visavi la Spagna senza resguardar la posiziuon sociala da la BC en lez pajais durant ils ses decennis anteriurs. Ina buna funtauna è l'essai da Frances Lennon, istorica da l'Universitad d'Oxford, cità suandantmain tenor sia versiun spagnola¹⁾: «La monarchia costituzionala d'Alfons XII (...) protegeva la BC (...) reconoschend la religiuon catolica romana sco quella dal stadi (art. 11 da la constituziuon da 1876), scumandond mintga manifestaziun da tschellas confessiuns, prescrivend che l'educaziun sa baseschia sin il catolicissem, che tuts archuevestgs vegniann commembers da la Chombra auta dal parlament (...) e che l'ensinada valia sco maridaglia» (pp. 145-146). Ma la BC cuntanscheva be ina part da la societad: «Da la creschientscha da las citads e l'industrialisaziun parziala en naschidas aglomeraziuns malsaunas plain famiglias d'immigrads, ma senza baselgias, spirituals e scolars. Ordaifer la sfera ecclesiastica vivevan ils paupers da las citads ed ils lavurants agriculs da la Spagna dal sid, ils quals n'eran betg disads d'ir en baselgia, e quai probablmain dapi la bandischada dals Arabs 1609-1613 (...). Perditgas religiosas, analisas statisticas e l'anticlericalissem dal pievel palesavan unanimamain la disditga da la BC (...). Sia ierarchia era dentant persvasa ch'il stadi duaja la proteger e sfurzar si quai ch'ella mussava (...). 1931 ha la pers ses protector principal, il retg, cun la victoria electorala da la republica; lur ha la BC stui s'adattar a (...) l'aboliziun da privilegis e subvenziuns. La constituziuon republicana lubiva plinavan la maridaglia civila ed il divorzi e scumandava als spirituals d'instruir en scola» (pp. 20-21).

L'uniun da crusch e spada

Lannon engrazia per «l'ospitalitad da l'Abazia benedictina da Montserrat ed ils raschienis gids la cun pader Hilari Ragner» (pp. 11-12). Lez istoricher catalan ha gist publictà per spagnol ils fritgs d'ina vaira lavur da benedictin davart «la baselgia e la guerra civila spagnola»²⁾. In chapitel da 15 paginas examinescha la dumonda sch'ils uffiziers rebels da 1936 hajan fatg valair motivs da politica religiusa cun prender las armas encunter la regenza legitima. La re-



Ins na po chapir la politica ecclesiastica dils onns 1936-39 visavi la Spagna senza risguardar la posiziuon sociala da la baselgia catolica durant ils ses decennis anteriurs.

sposta è clera: «Nagina, gnanc ina da las proclamaziuns da rebelluon sa referiva a la defaissa da la religiuon per motivar il culp da stadi» (p. 69). L'insurrecziun ha dentant survegni l'adesiuon immediata da la «Comuniun Tradicionalista» da Navarra ed ils 50 000 umens da sias legiuns cun trenament militar «che cumbattevan per Dieu ed il retg (...). Perditga da lez patratg guerril dat la frasa suandanta publictgada en lur gassetta, strusch in'emna suenter la proclamaziun da l'insurrecziun: 'La crusch e la spada en puspè unidas per cuntinuar ensemen la cruschada gronda da reconquista fatga da l'armada e noss voluntaris sut la protecziun da l'apostel son Giachen'» (p. 81). Per spagnol numn'ins uschiglio «reconquista» la conquista medievals successiva da l'intschess arab da la Penisla iberica entras la Navarra e tschels reginams cristians.

Persecuziuon ed adesiuon

«La Navarra è in cas spezial» (p. 80) da la guerra civila. L'autur punctuescha per il rest da l'intschess dals rebels: «I n'è betg uschia ch'els avessan supplitgà la baselgia da s'unir cun els, anzi, lezza ha sa surdada ad els fitg spert, corp ed olma. Quai als è stà ina surpraisa empernaivla; tar la violina da la propaganda naziunalista è la corda religiusa vegnida fitg spert la pli vibranta. Lezza adesiuon deriva cunzunt da la selvadia persecuziuon religiusa chaschunada dals extremists e criminals en l'intschess republican, nua che l'insurrecziun aveva disditg» (p. 84). Ragner deditgescha tschintg paginas da text ed indumbraels rinviaments bibliografics a quels mais da sang: «In'identificaziun sco spiritual, u simplamain sco cristian activ u commember d'in'uniun catolica u charitativa, tanscheva per vegnir mazzà senza process (...). La suletta retschertga sistematica e seriosa (...) dat ils nums da 7114 unfrendas: 12 uestgts, 4184 presseculars, 2635 muntgs e 283 mungias (...). Ins sto anc agiunscher ils laics morts per il medem motiv» (pp. 175-176). Lezzas cifras sa refereschan a l'entira durada da la guerra, pia atgnamain a ses emprims diesch mais (1936-1937) ed als davos dus en l'enviern da 1939.

Ils uestgts sustegnan ils rebels

L'archuevestg da Toledo, cardinal Isidro Gomá (1869-1940), ha manà l'adesiuon catolica a la rebelluon. 1936 ha il cardi-

nal parsura da la BC en l'Irlanda, sin giavisch da Gomá, «organisà ina collecta en tuttas baselgias dal stadi liber» (p. 112). La finamira uffiziala era «da reconstruir las baselgias sblundregiadas e destruidas en ils intschess republicans da Spagna conquistads pli tard da l'insurrecziun» (p. 111). La part la pli gronda, numnadamain £ 32 000, da las £ 44 000 racoltas ha Gomá dentant surdà a l'armada dals rebels. «Il destin da tschellas £ 12 000 n'enconuschi'ins betg» (p. 112). 1937 ha il schef da l'insurrecziun, general Francisco Franco Bahamonde (1892-1975), suttaless a Gomá in giavisch che lez ha lura resumà sco suanda en in rapport dals 12 da matg al Vatican: «Damai che tuts uestgts spagnols stettian senza resalva da la vart dal general e da ses 'moviment', duessan els publictar ina brev drizzada als uestgts da l'entir mund, supplitgond la pressa catolica da reproducir il text per restabilir la vardad» (p. 155). Cun premura ha il cardinal fatg per cumond: «Da chalanda fanadur ha la ierarchia spagnola, manada da cardinal Gomá (...), sa messa en acziun a moda extraordinaria cun ina brev cuminaivla als 'uestgts da l'entir mund'. Il text declerava che (...) millis cristians hajan 'prendi las armas sut atgna responsabladad per salvar ils principis religius', che la pussanza legislativa haja pruvà dapi 1931 da midar l'istorgia da Spagna a moda cuntraria als basegns dal spiert naziunal' (...) e che la guerra civila saja stada perquai teologicamain gista. Ils uestgts faschevan endament ils spirituals marterisads. I sa proclamavan consolads faschend endament quels inimis, fascinads da 'dctrinas satanicas, che hajan lura sa reconciliads' cun il Dieu da lur babuns avant che murir executads en virtid da la lescha, ch'en Mallorca sajan be 2 % morts senza prender penetienza ed en las regions dal sid tut il pli 20 %. Ils sutscrits concludevan nummond 'il Moviment naziunal ina vasta famiglia nua ch'il burgais cuntanscha ses svilup total' (...). Finalmain reproschavan els (...) als spirituals bascs ch'i n'hajan betg udi 'la vusch da la baselgia'»³⁾.

Ils Bascs encunter Franco

Ils spirituals bascs udivan la vusch da lur pievel, forsà il pli catolic da l'entira Spagna, ma tutina fidaivel a la republica. In scriptur catolic franzos commentescha: «Lezza aveva concedi als Bascs varsaquantas da las libertads ch'i bramavan.

Franco perencunter (...) punctuava sia voluntad da restaurar 'l'unitad naziunala' periclitada. Perquai han ils Bascs da Spagna resisti cun ils republicans ad in moviment che sa referiva tutina a la defaissa da la cardientscha e vegniva sustegnì da bunamain tuts catolics encunter il privel marxist (...). La Partida naziunala basca dumagnava la situaziun e vuleva defender la republica, damai che lezza garantiva las libertads bascas (...). L'entir clerus basc ha punctuà sia solidaritad cun ses manaders politics. Uschia è naschi il paradox ch'in dals pievels ils pli profundamain catolics da l'Europa sa chattava da la medema vart che gliued che persequitava la baselgia senza schanet e tranter ils adversaris da quels che cumbattevan t. a. per restituìr a la Spagna libertads religiusas abolidas da la republica (...). Ils 26 d'avrigl 1937 è success in eveniment ch'il capodovra da Picasso ha pli tard perpetuisà, numnadamain il bombardament da Gernika, citad sontga dals Bascs, cun 1654 unfrendas⁴⁾. Durant ils mais suandants han ils rebels conquistà il Pajais basc ed abolì sias libertads. Ragner: «En november ha il papa survegni in rapport da l'uestgts da lez pajais, Mateo Múgica Urreterazu, declerond ch'els 'cruschads' l'hajan chatschà davent da sia residenza e hajan cunzunt sajettà quattordesch spirituals da la diocesa ed empraschunà u sbandischà auters blier pli numerus» (p. 136). I s'enclegia che Múgica n'ha betg segnà la brev cuminaivla dals uestgts, «nua ch'ins ludava ils principis e l'applicaziun da la giustia da las dretgiras militaras» (p. 158).

Catalans ed umens da pasch

Ragner deditgescha ses essai «a la memoria da cardinal Francesc d'Assis Vidal i Barraquer, um da pasch en la guerra» (p. 6); lez Catalan, archuevestg da Tarragona, la veglia metropola religiusa da Catalogna, fugì 1936 en l'Italia, ha refusà da segnar la brev cuminaivla da 1937. Cun conquistar Tarragona en schaner 1939 ha Franco scumandà al cardinal da turnar en sia residenza. Vidal ha passentà ses davos onns da vita a la chartusa da La Valsainte/FR ed è mort 1943 en la chapitala chantunala. Là stavan già dus catolics catalans prominents che refusavan decisivamain la manzegna da la «cruschada». Carles Cardó (1884-1958), canoni da Barcelona, teolog e schurnalist, ha publictà

1946 a Paris ina «Histoire spirituelle des Espagnes» sin giavisch expressiv dal futur cardinal Charles Journet (1891-1975). Ramon Sugranyes de Franch (*1911), confident da Cardó, è pli tard vegni professor da linguatgs iberics a l'universitad ed auditor dal concil vatican. In auter catolic catalan «commember prominent da quella terza Spagna che na gieva a prà cun nagina da tschellas duas» (p. 220) era Manuel Carrasco i Formiguera (1890-1938), fundatur da la partida cristiandemocrata «Unió Democràtica de Catalunya»; en viadi tar la regenza basca è l'vegni fatg praschunier dals rebels, sentenzià a mort da lur dretgira militara e sajettà giu malgrad la suppli-ca da Pius XI: «Franco ha segir vuli dar ina schlaffada al papa» (p. 301). Els amis dal mort han organisà a Paris in servetsch divin da cordoli, nua ch'in chor basc ha chantà imnis gregorians ed il motet «Ecce quomodo moritur justus» («Guardai co ch'il gist mora»), en preschientscha t. a. dal poet Ventura Gassol (1893-1980) e da l'artist Joan Miró (1893-1983). Gassol era i en october 1936 a Londra sco cusseglier guvernativ e mess da la regenza catalana per obtenir la reconoschientscha da Catalogna sco stadi en cas da victoria dals uffiziers rebels: «Il Ministeri britannic da l'exteriur stava en posiziuon da spetga e mantegnava 'relaziuns uschè amicabileas sco pussaivel cun las autoritads catalanas'»⁵⁾. Cun la prolungaziun da la guerra è Gassol restà en exil.

Il papa benedescha ils victurs

En mars 1938 ha la «Legión Cóndor» (LC), dada ad emprist da Hitler als rebels, bombardà pliras giadas la citad da Barcelona. Il grond dumber da las unfrendas ha chaschunà protests internaziunals che han stimulà il schef da l'aviazion militara dals rebels da trametter il telegram suandant als commandants da la LC e da sia aviazion: «General Franco ma cumonda da far endament a l'aviazion da las Balearas il scumond, per motivs politics internaziunals, da bombardar aglomeraziuns» (cità p. 296). Era papa Ratti ha «appellà a Franco da desister da tals bombardaments» (p. 297). Ma Pacelli, elegi il 2 da mars 1939 sco Pius XII, ha renunzià a las resalvas da ses antecessur, anzi, el ha prendi per exempel il «general» dals gesuits ch'aveva già «cumandà a tuttas publicaziuns da l'urden da sustegnair il moviment militar» (p. 159, nota). Da chalanda avrigl ha l' telegrafà a Franco: «Nus auzain noss cor vers Dieu engraziand sinceramain per la victoria da la Spagna catolica [da nus] bramada» (cità p. 393). Els 16 ha l' lura gratulà a bucca en il radio: «Cun immensa legria ans drizzains a vus, uffants uschè chars da la Spagna catolica, per as exprimer nossa gratulaziun da bab per il dun da pasch e victoria. Dieu ha vuli encunrar l'eroissem cristian da vossa cardientscha ed amur, empruvà da tantas suffrientschas uschè noblas» (cità p. 394). Il messadi benediva anc «il schef da stadi e sia regenza, ils uestgts premurads ed il clerus altruistic, ils eroics cumbattents e tuts cartents» (cità p. 396). Uschia ha il papa benedi il victurs.

¹⁾ Frances Lennon, Privilegio, persecución y profecía. La Iglesia Católica en España 1875-1975. Madrid (Alianza Universidad, ISBN 84-206-2618-X) 1990.

²⁾ Hilari Ragner, La pólvora y el incienso. La Iglesia y la Guerra Civil española. E-08001 Barcelona (Ediciones Peninsula, Peu de la Creu 4, ISBN 84-8307-341-2) 2001.

³⁾ Hugh Thoma, The Spanish Civil War. Harmondsworth, Middlesex (Pelican Edition) 1968, pp. 575-576.

⁴⁾ Paul Sérant, La France des minorités. Paris (Robert Laffont) 1965, pp. 159-162.

⁵⁾ Victor Castellés, Nacionalisme català i Guerra Civil a Catalunya. Barcelona (Rafael Dalmau, ISBN 84-232-0641-6) 2002, p. 109.